

保舉九宮道備克得遊行三界升入金門此音無所不辟無所不覆無所不度無所不成天真自然之音也故誦之致太極下觀上帝遙唱萬神朝禮三界侍軒羣袂東首鬼精自亡琳琅振響十方肅清河海靜默山嶽吞煙萬靈振伏招集羣仙天無氛穢地無妖塵冥慧洞清大量玄玄也

元始無量度人上品妙經卷之三十五

靈寶無量度人上品妙經卷之三十六 第六

八景神合品

道言昔於朱陽天中玄極靈歌太融昌土受元始度人八景神合無量上品元始天尊當說是經周四十過以召十方始當詣座天真大神上聖高尊妙行真人三元八景大神無鞅數眾乘空而來靈雲敷華寶輿玉軒紫蓋扶蔭神境同光瑞色交朗八道煥明七日七夜諸天八景合映自然千神萬靈冥洞一氣混化同輪一國地土山川林木煒耀齊鮮高下彌漫坦平一等土皆浮異彩纏羅之色眾真侍座元始天尊玄坐空浮萬氣穹窿洞景瓊臺之上說經一遍諸天大聖同時稱善是時一國男女欲念未獲斷除說經二遍達悟至真說經三遍識用通玄說經四遍妙和元氣一合其形說經五遍神精凝粹保鎮軀靈說經六遍萬神結華與身齊并說經七遍三宮帝尊朝集神真說經八遍百關固密宮府相連死尸塞絕斷滅胞根說經九遍三部開朗八景齊歸說經十遍神明洞合舉形飛仙

是時一國是男是女莫不傾心皆受護度咸得長生

道言是時元始天尊說經一遍東方無極無量品至真青景大神無鞅之眾浮空而至說經二遍南方無極無量品至真丹景大神無鞅之眾浮空而至說經三遍西方無極無量品至真素景大神無鞅之眾浮空而至說經四遍北方無極無量品至真玄景大神無鞅之眾浮空而至說經五遍東北無極無量品至真生景大神無鞅之眾浮空而至說經六遍東南無極無量品至真明景大神無鞅之眾浮空而至說經七遍西南無極無量品至真華景大神無鞅之眾浮空而至說經八遍西北無極無量品至真幽景大神無鞅之眾浮空而至說經九遍上方無極無量品至真合景大神無鞅之眾浮空而至說經十遍下方無極無量品至真化景大神無鞅之眾浮空而至十過周竟十方無極天真八景大神一時同至一國男女傾心歸仰欣躍而言我等各以善因或從道業證過福緣得居此天

獲觀天尊說此八景神合之法上真至化之道非我輩等素所知聞今當聞者必獲位進上真備契玄理而我等昔來未聞此道不識八景神合之妙豈能超合混元大道之宗於是來詣天尊請聞至教有如細雨霽霧無軌之東迺國一半土皆偏陷非可禁止是時元始天尊周覽十方垂顏凝顧揮五明羽扇徐啓玉音彰明法要開顯太極一氣分化判為三辰離為八景八景者八方光景自然之神也天之八景有三部以隸三元人之八景有三部以隸三閏故三部八景二十四真為上道之高靈修用其道使八景之氣與已神合則混合百神聚為帝一散為千真立成高仙也天之八景上元八景在玉京蕭臺中元八景在太微紫宮下元八景在崑崙之室人之八景上合泥丸中合絳宮下合丹田各有名字大小服色所居之處能招天景以合人神八景之靈混與神合則為高真矣其首要玄妙虛明洞徹清靜明照專此八事而修此道無不克臻此八者八景之德性也兆知勤此

陽精八景真神之道則八景之神自降於子授子洞玄長生之真仙矣大衆于時聞是語已再拜稽首願盡至言以教未悟今日慶幸獲聞妙法波我沈疇三請不止於是元始化一元精狀如朱日寶華耀耀在空玄之中去地九丈元始登引天真大神上聖高尊妙行真人十方無極八景大神無執數衆俱入朱日之中天人仰看惟見勃勃從寶華中入既入其中不知所入國人廓散地還平正無復敬愒元始即於日華之內說經都竟衆真監度以授於我當此之時喜慶難言法事粗悉諸天復位條欵之間寂無遺響是時天人遇值經法普得濟度全其本年無有中傷傾土歸仰咸行妙心合道合虛合无合神合明合景合照合清合玄合妙情無妄偽性備天真齊同慈愛異骨成親國安民豐欣樂太平經始出教一國以道預有至心宗奉禮敬皆得度世

隱名也非世之常辭此能長壽修誦八景神合與天爲一七世滅歎胞尸閉塞上聖已成真人通玄究微能悉其章誦之十過諸天遙唱萬帝設禮心源澄寂害氣消沉洞合八景神真內盈羣魔束形鬼精滅蕪迴屍起死白骨成人至學之士誦之十過關八景扶衛三元稽首魔精喪眼鬼杖滅爽濟度番死絕而得生所以爾者學士穢氣未消體未洞真存召八景功未克全天政德可伏除魔試却滅災患但不死而已不能更生輕誦此章身則彼殃供養尊禮門戶興隆世世昌熾與善因緣萬災不干神明護門斯經尊妙獨步玉京度人無量爲萬道之宗魏龜大範德難可勝道言凡誦是經十過八景齊降殃注斷滅億曾萬祖幽魂苦爽皆即受度上升朱宮格皆九年受化更生得爲貴人而好學至經功滿德就皆得神仙飛昇金闕遊宴玉京也上學之士修誦是經智慧開明舍兇育英八景神合道契玄庭皆即受度飛昇南宮世人受誦則身中人景固律死門天中八景下合此形

神景齊會得道成真延壽長年後皆得作飛升之道魂神變鍊不經地獄哀惱常保孩嬰遊行太空此經微妙普度無窮一切天人莫不受慶無量之福生死蒙惠上天所寶不傳下世至士齋金寶效心盟天而傳輕泄漏慢殃及九祖長役幽官侍經五帝玉童玉女各二十四人營衛神文保護受經者身

道言正月長齋誦詠是經上部八景降兆神庭泥丸玄堂七祖超遷度上南宮七月長齋誦詠是經中部八景與兆合并黃元混一天地同靈身得神仙諸天書名青籙紫簡舉形飛仙十月長齋誦詠是經下部八景固兆生根真精鍊化萬炁結神儻輪太霄遨遊上清億世含歡浩劫齊齡八節之日誦詠是經八景神合起登玉京得為上清真人本命之日誦詠是經三部八景二十四真混變嬰兒錦衣繡裙列坐泥丸身宮之中魂神澄正萬炁長存百關受鍊身有光明三界侍衛五帝司迎萬神朝禮書名上天功滿德就飛昇上清道言行道之日皆當香湯沐浴齋戒入室

東向叩齒三十二過上聞三十二天心拜三十二過閉目靜思身坐八色雲氣之中內外翁冥有青龍白虎朱雀玄武獅子白鶴羅列左右二十四真來到此前日月照明洞煥室內項生圓象光映十方如此分明察呪曰

無上玄元太上道君召出臣身中三五功曹左右官使者侍香玉童傳言玉女五帝直符直日香官各三十二人關啓所言今日吉慶長齋清堂修行至經無量度人願所啓上徹徑御

無上三十二天元始上帝至尊几前畢引系三十二過東向誦經

元始無量度人上品妙經  
元始洞玄靈寶本章八景神合上品妙首十回度人八景隱韻離合自然帝氣元真幽家高宸冥漢之始空洞靈宗分化結形數鎮百關三宮布列纏絡迴環環髮上境合鍊精根

無神不光無神不明無神不立無神不成無神不度無神不生是謂妙極天中之尊玉闕明堂流珠玄丹上衝華極巍我崑崙紫文羅輝煥交騰下通中黃絳宮之門臍元幽室瓊房之田八景神氣周用迴旋中有三部八景二十四真之神中有虛明通徹清靜光照之君中有南極長生大帝君中有東極青華帝君中有度世司馬大神中有好生韓君丈人中有南上司命司錄延壽益算度厄尊神迴骸起死無量度人今日校錄諸天臨軒

東方無極一景天虛神王長生大聖無量度人  
南方無極二景天印神王長生大聖無量度人  
西方無極三景天曜神王長生大聖無量度人  
北方無極四景天玄神王長生大聖無量度人  
東北無極五景天符神王長生大聖無量度人

東南無極六景天光神王長生大聖無量度人  
西南無極七景天姥神王長生大聖無量度人  
西北無極八景天真神王長生大聖無量度人

上方無極三部總真天慧神王長生大聖無量度人  
下方無極三部神合天順神王長生大聖無量度人

十方至真三部八景神王長生度世無量大神並乘華雲流霄寶輿玉駢紫蓋靈輪騰駕素靈神虎蒼精妙龍建玄元之節洞景朱幡前詠三辰華曲後參五曜真歌青鸞翠鳳鳴彌相和高仙啓塗玉女翼轅億乘萬騎浮空駕虛傾光迴駕混合人身元皇太一洞房玄宮左持五籍右乘五符三迴九轉洞化冥元隨景應召開朗八區凝和結氣高超太無大魔係舉天皇授書普告十極洞府神君開釋祖考億劫沉魂脫除罪籍散落禍根敢有停

滯烈火蕩焚身既升度上及億曾永出夜庭復備形理普受鍊化度品南宮朱陽紀錄仙化成人身受度劫劫長存隨劫流轉與天齊年永度三陰五苦八難超凌三界通運上清上清之天天帝洞昌無色之境梵行

東方八天  
翼真元慈天 帝經角司神  
洞靈開濟天 帝恬淵景虛  
昭素欽宗天 帝慶嘉靈玄  
輔元敢需天 帝大極右扶

玉履羲常天 帝生功拔蒼  
神德仰真天 帝逸車婁玄  
皇度禮方天 帝善回夷陽  
生懺操陽天 帝主靈蓮華  
南方八天

玉曆紀功天 帝道忻致登  
雲輶素書天 帝七臯無阿  
八直清明景會天 帝孝儀奉仙  
化及冲要天 帝烈常希真  
赫丹保年天 帝妙氣承陽

洞虛朝皇天 帝紫維志聰  
披星濟靈天 帝開明度生  
璇芳助月天 帝滿都斗皇  
西方八天  
會氣集景天 帝昆堂抱思  
朝祖欽元天 帝越康子明  
擲千起威天 帝運明育初  
奮容東魔天 帝敷契頌庸  
受嚴持福天 帝覺育自中  
宣道招靈天 帝遜佑守成

啓極司化天 帝章瑤允  
梵廣審清天 帝寅熙融神  
北方八天  
披真恭慶天 帝臯蕭紫瑤  
錫籙崇用天 帝鐸時勤  
應化成功天 帝滄塘雲翻  
壁羅納靈天 帝魂度九王  
折梁緒明天 帝仲方奇  
海映龍剛天 帝蒙長生  
星井瑤璣天 帝歷陞麗寧

帝章瑤允  
帝寅熙融神  
帝臯蕭紫瑤  
帝鐸時勤  
帝滄塘雲翻  
帝魂度九王  
帝仲方奇  
帝蒙長生  
帝歷陞麗寧

八神合景天 帝誠化曜靈

三十二天三十二帝諸天隱諱諸天隱名天  
 中空洞自然靈童諸天隱韻八景之音八景  
 之尊八景之神八景真王八景之靈八景神  
 合變化上清無量之奧深不可詳數落神真  
 普度天人今日欣慶受度神境為一湛湛真  
 元守而勿疑位登高仙金顏玉巖虛微不室  
 明識無虧通導不壅徹運忘機清無滯濁淨  
 無穢氛光華輝朗照寂自然神有八道合此  
 八關結化為形錦帶龍衣神化純妙道遠玉  
 階受職東華制命三官永滅眾惡斬絕胎根  
 塞斷死尸名列太玄三省監舉無有留難東  
 斗主算西斗記名北斗落死南斗上生中斗  
 大魁總監眾靈青帝護魂洞景致真白帝侍  
 魄華景安宅赤帝養氣元景受明黑帝通血  
 慧景朗徹黃帝中主合景備列青天真王青  
 景化神赤天真王丹景曜明白天真王素景  
 混靈黑天真王玄景靜深黃天真王八景齊  
 輪五天真王萬神之宗飛行鼓從總領神兵  
 魔幢鼓節遊觀太空自號赫奕諸天齊功上

天度人嚴攝北鄴神王受命普掃不祥神龍  
 攝毒天馬四張辟非前驅天將持幢擲火萬  
 里流鈴八衝敵有千試拒遇上真金鉞前戮  
 玉斧後刑屠割鬼夾風火無停千千截首萬  
 萬剪形魔無千犯鬼無秋積三官北鄴明檢  
 鬼管不得容隱金馬驛呈普告無窮萬神咸  
 聽三界五帝列言上清

真皇王訣玄化混冥軀旋妙氣香萬之中上  
 景非色下景非淵中景太虛冥合自然八景  
 神合金剛乘天天下無幽無冥無形無  
 影無極無窮二十四真周環列宮天地始成  
 神帝降龍漢津大梵遠廓無光八景開圖三  
 部敷張元始安鎮敷落五篇赤書玉字八威  
 龍文保制劫運使身長存梵氣彌羅萬範開  
 張元網流演三十二天輪轉無色周回十方  
 旋斗歷算回度五常三十五分總氣上元八  
 景神合氣入玄玄玄中太皇上帝高真汎景  
 太霞嘯詠洞章金真朗郁流響雲管玉音攝  
 氣靈風聚烟紫虛鬱秀翊真萬仙子和萬合  
 自然成真真中有神八景玉玄神景之尊長

生大君無英公子白元尊神太一司命桃康  
 合延執符把籙保命生根上遊上清出入華  
 房八景之內細微之中下鎮人身泥丸絳宮  
 中理五炁混合百神十轉迴靈萬氣春仙仙  
 道責生無量度人八景飛神過度輪轉罪福  
 禁戒宿命因緣普受開度死魂生身身得受  
 生上聞諸天諸天之上各有生門中有空洞  
 謠歌之章八景靈篇辭來高真

第一八景神合飛空之音

天有三元氣 人有三部關 二十四真神  
 紫戶連青扉 上部有八景 四景居泥丸  
 又復四境居 在彼咽喉間 滂光與季行  
 幽陀及越庚 肺腑攜顛顛 玉侍引叔淵  
 是名四星君 保此泥丸間 辟祛却萬邪  
 鬼扶母得干 喉中有四景 華華史史神  
 賓元與子柯 青奇伯羅君 桃蘭蔚蹊子  
 貫列相纏綿 保兆冥運機 神合純和金  
 萬劫長不衰 億齡猶合歡

第二八景神合真王之章  
 高上雕玉軒 浮駕華景龍 遊宴三元宮

靈日光瞳矚 中部有八景 侍兆生關中  
 能存而守之 身登玉京山 心中居四景  
 黃寅併景霏 誦誦連祝祝 師南與孟暉  
 望高並鹿去 護衛長生靡 陽華制靈魂  
 固衛玄微津 四景在膽中 虛嗟子張神

第三八景神合真王歌

鎮凶奉仙子 霄度禹疆君 祭輝瑤芳來  
 金至瓊觴和 鎮彼天德君 永除世灾殃  
 八景神合一 六氣御飛翔 賜兆司命書  
 億載無悲傷

日車雲旗 玉佩瓊璫 坐宴金闕  
 指顧樽桑 二十四真 與王頡頏  
 飛翥神霄 踏菴華房 下部八景  
 神名作彊 生化萬靈 權衛斗剛  
 腎中四景 玄真大靈 毛毛叱叱  
 紫選輔真 月女落雲 四景真人  
 護兆育嬰 保天長存 勝脫四景  
 公碩佃濛 亭亭幻光 芝仙伸達  
 雄元次陽 雲網內通 淨府不穢  
 除滅鬼凶 三部八景 二十四童

錦衣繡裳 住兆神宮 合眷如一  
 晝飛高冲 試爲此歌 嘖彼仙公  
 生道眇邈 世莫我窮 兆能體之  
 騰轡華龍

此三界之上飛空之中真王歌音音參洞章  
 誦之百遍名度南宮誦之千遍真王保迎萬  
 遍道備飛升太空過度三界位登仙公有聞  
 靈音真王敬形敕制地祇侍衛送迎拔出地  
 戶五苦八難七祖升遷永離鬼官魂度朱陵  
 受鍊更生是謂無量普度無窮有秘上天文  
 諸天共所崇泄慢墮地獄禍及七祖翁  
 道言此二章並是諸天上帝及八景神王隱  
 秘之音兆誦詠之則百神混合八景同歡抱  
 神成真身生羽翰皆是大梵之言非世上常  
 辭言無韻麗曲無華宛故謂玄奧難可尋詳  
 上天所寶秘於高上神霄玉清玉府東華玉  
 堂經室之內道君下治傳教流行若有至人  
 齋金寶質心依舊格告盟神實然後而付焉  
 道言夫天地運度否終日月五星虧盈至聖  
 神人休否木學之夫疾傷凡有此災同氣皆

當齊心修齋六時行香十遍轉經福德立降  
 消諸不祥無量之文普度無窮  
 道言夫末學道淺或仙品未充運應歲度身  
 經大陰臨過之時同學至人爲其行香誦經  
 十過以度屍形如法則八景俱降真神合昇  
 左飛右伏神行氣谷乍合乍離景與神冥朽  
 者更新隨著復支魂神徑上南宮隨其學功  
 計日而得更生輪轉不感便得神仙  
 道言夫天地運終星宿錯度日月失昏四時  
 失度陰陽不調國境生災疫毒流行兆民死  
 傷師友命過同學非殃亦當修齋行香誦經  
 夫齋戒誦經功德甚重上消天災保鎮帝王  
 下禳毒害以度兆民生死受賴其福難勝故  
 曰無量普度天人  
 道言凡有是經能爲天地帝主兆民行是功  
 德有災之日發心修齋燒香誦經十過皆諸  
 天記名萬神侍衛右列至人克得爲聖君金  
 闕之臣諸天記人功過毫分無失天中真王  
 亦保舉爾身得道者乃當洞明至言也  
 諸天中大梵隱語無量音 道君謨

元始靈書八景神合內篇

東方八天

恥明規般 蔣籍濤外 變維宏珂  
 曆展攸最 彭谿瀆又 儀渤窮粹  
 靈敞懷堂 保嘉瑤位 卓評靜魔  
 擇騫扶頗 緣演定足 優柱頻羅  
 邀川洪嗣 幽涂並魔 謁關領仙  
 格降越和

南方八天

緣祈嶺南 迕稍宵貝 丁河宰池  
 邈翔萬銳 甲靈梵除 清宣網沛  
 彭都宰難 約箕亨會 處昌倫房  
 九俞蘭從 智澄雲瑤 力濟奧類  
 耿參玄地 運魂巢燔 孽吠顛騰  
 揚旗束轅

西方八天

武堅迎邦 捐暉隗方 寧緒岨並  
 究清紀皇 持魚曜隄 伊那妙光  
 鈕乾秘賓 寧孤極良 障彬越都  
 泰鈞觀剛 醫眇熾撮 奕枚魯航

祝陀拒鈞 誅機翹倫 亮古忠悌  
 允鄙威羣

北方八天

賁融技傍 珏倭溫類 延搜毗芒  
 淵嚴詹音 寂相據育 運微聊源  
 通隔蕭頂 權著靈隨 養華靈合  
 玉神飛圖 滑瀛佐丘 直克綺烏  
 略靜邊迤 琤瑄米虛 逸澄俯訂  
 赭巖稽符

道言此諸天中大梵隱語無量之音舊文刻  
 記龍山北岡之室以調正三元為洞真之宗  
 高仙真人皆銘誦佩服以交八景之神真氣  
 流布諸天下及世間皆仙官真壁玉女醮煙  
 樂御羣靈災厄莫千字皆廣長一文天真皇  
 人昔書其文以為正音有知其音能齋而誦  
 之者諸天皆遣飛仙玉郎八景大神下觀其  
 身書其功勤上奏諸天萬神朝禮地祇侍門  
 大功真王保舉上仙八景道備魁得遊行三  
 界升入金門此音無所不辟無所不獲無所  
 不度無所不成天真自然之音也故誦之致

飛天下觀八景遙降萬神朝禮三界侍軒羣  
 杖束首鬼精自亡琳琅振響十方肅清河海  
 靜默山嶽吞煙萬靈振伏招集羣仙天無氛  
 穢地無扶塵真慧洞清大量玄玄也  
 元始無量度人上品妙經卷之三十六